

四庫全書

經部

欽定四庫全書

經部

周官總義卷二

詳校官監察御史

臣邱文性

刑部郎中

臣

許兆楨覆勘

勝錄監生

臣龍坪耕

監生

臣曾照

欽定四庫全書

經部四

周官總義

禮類一 周禮之屬

提要

臣等謹案周官總義三十卷宋易祓撰祓有
易總義已著錄是書陳振孫書錄解題不載
惟趙希弁讀書附志著錄稱許儀為之序刻
於衡陽今衡陽本世已無傳惟永樂大典尚
載其天官春官秋官考工記而地官夏官亦

佚謹哀合四官之文編次成帙以存其舊其
地官夏官則採玉與之周禮訂義所引以補
其亡仍依讀書附志所列勒為三十卷雖非
完帙然十已得其八九矣其書研索經文斷
以己意與先儒頗有異同如論大宰九賦則
援載師之任地及司市司關什人角人職幣
等職以駁口率出泉之說論宗廟九獻則合
籩人醢人內宰司尊彝及行人王禮再裸之

文以駁列裸事於九獻之說論肆師之祈珥
則引羊人小子及山虞諸條以糾改祈為甸
改珥為卹之說論輶人之四旗則厯辨巾車
司常大司馬大行人與考工記不合以明曲
禮車騎為戰國之制諸如此類雖持論互有
短長要皆以經釋經非鑿空杜撰至於內宰
二事則改為副貳之貳於酒正式灋則指為
九式之灋於園廡漆林諸賦則謂以什一取

民又於一分中分十一十二二十之三數等而輸之於王於凌人斬冰則謂十二月為建亥之月先令之於亥月而後三為凌室以待亥子丑三月之藏亦皆自出新義而於職方氏之地理山川尤為詳悉雖其釋三江則混於蘇氏之說釋波澌則膠於唐志隨縣之文釋泐水濟水則據漢志而強分為二多所未安要其援引明晰自不可沒蓋祓雖人品卑

汚而於經義則頗有考據不以韓侂胄蘇師
旦故掩其著書之功也乾隆四十六年七月

恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

提要

欽定四庫全書

周官總義卷一

宋 易祓 撰

天官冢宰第一

惟王建國辨方正位體國經野設官分職以為民極
極中也此經並列於六官之首者言六官所掌之
事無非示中于天下取中于王國也詩曰商邑翼翼
翼四方之極古者建國皆本于此然周都鎬京而
復宅洛邑者取其居天下之中而已昔者成王之

世制禮作樂立一王之法乃卜澗水東瀍水西而
作王城又卜瀍水東而作下都以遷殷之頑民新
邑既成乃時會諸侯於洛是知中天下而立定四
海之民斯王之所以建國歟辨方則以日景北
極辨東南西北之方正位則以祖社朝市正左
右前後之位體國則宮城門涂之度皆如人之
有體經野則丘甸溝洫之畫皆如絲之有經四
者既備而後治道舉焉故設官則六典之官各處

以職分職則六官之職各命以事無非所以任推行
民極之責也所謂民極者于書可以互見營洛之始
召公相宅乃作召誥其說曰王來紹上帝自服于土
中及洛邑告成周公還政乃作洛誥其說曰其自時
中又萬邦咸休周召二公相與維持以成周家一代之
治者要皆中道之所寓至于周官之作則成王親政
開物成務之書也觀當時有官君子無非推行成王
之德意則所謂設官分職以為民極者可得而悉矣

六典所載自周官出所以並列于六官之首

乃立天官冢宰使帥其屬而掌邦治以佐王均邦國

冢宰大宰也鄭氏謂進退異名蓋所主一官不兼他
事則與六官同謂之大是退異名也上佐天子而百
官總焉尊于六官獨謂之冢是進異名也書曰冢宰
掌邦治統百官均四海與此佐王均邦國同意謂之
佐王均邦國則非三公不足以任之故周公以三公
兼冢宰見于蔡仲之命公薨而召公亦以三公兼冢

宰見於康王之誥其佐王均邦國而謂之冢宰者在
周典亦間見其一二大宰之職曰凡邦之小治則冢
宰聽之是對王之大治而稱冢也宰夫之職曰以官
刑詔冢宰而誅之是主王之官刑而稱冢也司會曰
以詔王及冢宰廢置是廢置參乎王而稱冢也內府
曰凡王及冢宰之好賜予則共之是好賜予參乎王
而稱冢也御史曰掌邦國都鄙及萬民之治令以贊
冢宰是治令達夫天下而稱冢也凡此數者事大體

重故謂之道揆而兼以三公之職公羊氏之傳春秋曰天子之相何以三自陝而東周公主之自陝而西名公主之一相處乎內乃冢宰之任初非別置一相即周公名公之所兼者是也若夫成周設官之兼冢宰者職掌雖一而體統異矣此序官所以先列冢宰而後言大宰於治官之屬

治官之屬大宰卿一人小宰中大夫二人宰夫下大夫四人上士八人中士十有六人旅下士三十有二人

大宰所以長治官而乃列於治官之屬者言其分職
聯事亦所以相屬也故以卿一人為之然卿乃上下
之通稱上聯三孤則為九卿下設中大夫而卿亦上
大夫故大宰卿一人即以中大夫二人贊之此小宰
所以為治官之貳小宰中大夫即以下大夫四人贊
之此宰夫所以為治官之考以至八人之上士十有
六人之中士三十有二人之下士凡六等其數皆以
倍即鄭氏所謂轉相副貳者在六官皆然然六官及

遂師其下士獨謂之旅者何也衆也他如行夫之下士亦三十有二未嘗不衆也而不得言旅不得同乎六官鄉遂之尊故也今自旅下士等而上之以至于卿在大宰一官凡六十有三推之於五官又推至於三百六十職則不啻數百倍又以六卿推之為中大夫者凡三十人為下大夫者一百八十八人為士者萬八千七百五十人推之於六遂又推之於四等公邑三等采地則亦不啻數十倍何其繁也大抵成周官

不必備非特三公之職自一命以上無非兼官以行事鄭氏釋大司馬序官曰凡軍帥不特置選於六卿之吏自卿以下德可任者使兼官焉自軍帥不特置者推之則知六職之不常有者亦不特置也自卿以下兼官者推之則知其他列於六屬者亦皆兼官也況成周之制卿大夫則制以邑三等之士則授以田設官雖多總攝有道是殆不可以泛觀之矣餘見地官序府六人史十有二人胥十有二人徒百有二十人

周官府史胥徒設職甚多而不詳所出在天官者凡二千六百六十有六在春官者凡二千二百四十有一在夏官者凡三千二百六十有五在秋官者凡二千六百五十有七冬官雖散落無紀亦可類見唯地官無常職凡職於山林川澤者其數不可勝計杜氏通典總言其為六萬三千六百七十五人不調諸民其誰實為之或謂出於閒民然閒民轉移執事乃九職之一豈足以備六萬三千六百七十五人之數孟子所言與庶人在官者同祿謂在官而受田

者非于百姓受田之外而別置府史胥徒之職考之周
典自有成說大司徒之頒職事其十有二曰服事鄭氏
謂其服公家之事者也鄉大夫登其夫家之衆寡其舍
者服公事者鄭氏謂其吏之有復除者也又鄭氏釋府
史則曰皆其官長所自辟除非所謂吏之有復除者乎
釋胥徒則曰此民之給徭役者非所謂服公家之事者
乎今以鄭氏之說而考論成周之制古者王畿千里提
封百萬井受田者凡九百萬夫其間有德行道藝之民

及三年大比則升于司徒而不征于鄉餘則老疾之外皆有所服之事此府史胥徒之所從出者也

宮正上士二人中士四人下士八人府二人史四人胥四人徒四十人

宮伯中士二人下士四人府一人史二人胥二人徒二十人膳夫上士二人中士四人下士八人府二人史四人胥十有二人徒百有二十人

庖人中士四人下士八人府二人史四人賈八人胥四人徒四十人

內饗中士四人下士八人府二人史四人胥十人徒百人
外饗中士四人下士八人府二人史四人胥十人徒百人
亨人下士四人府一人史二人胥五人徒五十人

甸師下士二人府一人史二人胥三十人徒三百人

獸人中士四人下士八人府二人史四人胥四人徒四十人
獻人中士二人下士四人府二人史四人胥三十人徒三百人
鼈人下士四人府二人史二人徒十有六人

腊人下士四人府二人史二人徒二十人

醫師上士二人下士四人府二人史二人徒二十人

食醫中士二人

疾醫中士八人

瘍醫下士八人

獸醫下士四人

酒正中士四人下士八人府二人史八人胥八人徒八十人

酒人奄十人女酒三十人奚三百人

漿人奄五人女漿十有五人奚百有五十人

凌人下士二人府二人史二人胥八人徒八十人

籩人奄一人女籩十人奚二十人

醯人奄一人女醯二十人奚四十人

醢人奄二人女醢二十人奚四十人

鹽人奄二人女鹽二十人奚四十人

冪人奄一人女冪十人奚二十人

宮人中士四人下士八人府二人史四人胥八人徒八十人

掌舍下士四人府二人史四人徒四十人

幕人下士一人府二人史二人徒四十人

掌次下士四人府四人史二人徒八十人

大府下大夫二人上士四人下士八人府四人史八人

賈十有六人胥八人徒八十人

玉府上士二人中士四人府二人史二人工八人賈八人胥四人徒四十有八人

內府中士二人府一人史二人徒十人

外府中士二人府一人史二人徒十人

司會中大夫二人下大夫四人上士八人中士十有六人府四人史八人胥五人徒五十人

司書上士二人中士四人府二人史四人徒八人

職內上士二人中士四人府四人史四人徒二十人

職歲上士四人中士八人府四人史八人徒二十人

職幣上士二人中士四人府二人史四人賈四人胥二人徒二十人

司裘中士二人下士四人府二人史四人徒四十人

掌皮下士四人府二人史四人徒四十人

內宰下大夫二人上士四人中士八人府四人史八人
胥八人徒八十人

內小臣奄上士四人史二人徒八人

閹人王宮每門四人園游亦如之

寺人王之正內五人

內豎倍寺人之數

九嬪

世婦

女御

女祝四人奚八人

女史八人奚十有六人

典婦功中士二人下士四人府二人史四人工四人賈
四人徒三十人

典絲下士二人府二人史二人賈四人徒十有二人
典桌下士二人府二人史二人徒二十人

內司服奄一人女御二人奚八人

縫人奄二人女御八人女工八十人奚三十人

染人下士二人府二人史二人徒二十人

追師下士二人府一人史二人工二人徒四人

屨人下士二人府一人史一人工八人徒四人

夏采下士四人史一人徒四人

大學論治國平天下之道曰欲齊其家先修其身欲修其身先正其心此三者統宗會元之地萬化之所從出也文王肅肅在廟雖雖在宮刑于寡妻至于兄弟無非

所以為周家數聖人相傳之懿至周公攝政建六典之
官大而正朝綱重國體凡百司庶府詳法略則本數末
度靡不畢舉而天官所統造原立本不過此三者而已今
自天官分職而論之大宰卿一人而兼之以三公則論道
經邦變理陰陽有以格人主之非心小宰掌建邦之官
刑而有以正其治於宮庭之間宰夫掌王及三公六卿大
夫羣吏之位而有以正其俗於朝廷之上以至宮正官伯所
掌之官府士庶子凡在王所罔匪正人使之日聞正言日

見正行皆所以輔成君德而納君於當道是固所以為
人主正心之端也而猶以為未焉以人主之尊不厚其
身無以厚天下而護養國家元氣之本正在於護養人
主之身故其設官自膳夫而下主膳羞饗亨之味甸師
而下主禽獸魚腊之獻醫師而下主飲食調和之味
酒正而下主酒冰醯醢之物宮人而下主宮舍幕帟之
儀使人主端居九重心廣體胖血氣和平志慮充溢
而後民命國脉始有所恃宜足以享天下之備奉矣

而人主之心自視歆然不敢以自安舉天下之財雖
曰王之膳服不會而總於大府者莫不皆有一定之
式玉府掌其器物內府掌其貨賄外府掌邦布之入
出皆有式法以行之及其用之則司會會其財司書
掌其書職內以下莫不惟式法之是守使人主不以
天下自利而常有以厚天下之利是又所以為人主
修身之端也而猶以為未焉蠖濩蝓蝓深嚴邃密親
公卿大夫之時常少而親宦官宮妾之時常多故王

者皆以法制裁之夫人不列於官九嬪世婦女御不著其數以見王者嚴於內官之選初不過取而輕擇內宰下大夫之外如內小臣典婦功絲枲染人追屨之官亦皆以上士中士下士為之小夫儉人不得廁迹於其間閹寺之徒曾不數十固大異於後世之鳴璫曳組含天憲而握王爵者宮壺朝署事均一體而萬務咸理是又所以為人主齊家之端也莫切於人主之心莫親於人主之身莫重於人主之家而大宰皆

得以道揆之以至宿衛扈從洒掃使令之徒寢處燕
息沐浴櫛鬻私猥之事亦莫不皆取正於大宰夫是
以政本出於上政權不移於下上下有總攝之政內
外無壅隔之勢此大宰佐王之大者而聖人治國平
天下之道萃見乎此矣

大宰之職掌建邦之六典以佐王治邦國一曰治典以
經邦國以治官府以紀萬民二曰教典以安邦國以教
官府以擾萬民三曰禮典以和邦國以統百官以諧萬

民四曰政典以平邦國以正百官以均萬民五曰刑典以詰邦國以刑百官以糾萬民六曰事典以富邦國以任百官以生萬民

典常也大宰並建六典本以治邦國為主而兼及於百官府以至萬民者百官府則推行吾之六典者也萬民則吾六典之所先及者也王者之治天下自治為先正朝廷以正百官正百官以正萬民而後遠近四方從焉故於百官萬民則致其詳於邦國之諸侯

則舉其畧詳內畧外而邦國自治此所以為大宰六
典之序一曰治典以經邦國者理之使不易其常之
謂經然治必先於官府而推之以紀萬民紀謂錯綜
而不遺詳於經者也二曰教典以安邦國者導之使
不拂其常之謂安然教必先於官府而推之以擾萬
民擾謂馴習而不違詳於安者也三曰禮典以和邦
國者交好常有以相親之謂和然禮必先於統百官
而推之以諧萬民諧謂相信而不乖詳於和者也四曰

政典以平邦國者分守常有以相制之謂平然政必先於正百官而推之以均萬民均謂至公而不私詳於平者也五曰刑典以詰邦國者辭命常有以相戒之謂詰然刑必先於儆百官而推之以糾萬民糾謂織悉而不差詳於詰者也六曰事典以富邦國者財利常有以相資之謂富然事必先於任百官而推之以生萬民生謂惠養而不窮詳於富者也詳內略外其序如此方其在六典也五官與大宰各司其一大

宰所掌特專於治典而已及其佐王論道則五官聽
焉曰教曰禮曰政曰刑曰事雖各列其目而統於大
宰則皆謂之治故曰佐王治邦國所以見當時治本
之悉出於一者如此

以八灋治官府一曰官屬以舉邦治二曰官職以辨邦治
三曰官聯以會官治四曰官常以聽官治五曰官成以
經邦治六曰官灋以正邦治七曰官刑以糾邦治八曰
官計以弊邦治

灋亦典也詳於典故曰法官府者朝廷百官所居之府所以行法守者也大宰歲終則令百官府各正其治受其會謂之百官府則非特治官而已凡六官之職皆在所統一曰官屬者即小宰之六屬使之各揚其職故曰舉邦治二曰官職者即小宰之六職使之各任其事故曰辨邦治三曰官聯者即小宰之六聯使之上下相承故曰會官治四曰官常者即宰夫治數之官常使之多寡相稽故曰聽官治五曰官成者

即小宰八成之書使其條目不相侵紊故曰經邦治
六曰官法者即小宰七事之法使其戒懼不至廢弛
故曰正邦治七曰官刑者即小宰所徇之常刑用以
儆戒人心故曰糾邦治八曰官計者即小宰所弊之
六計用以廉察人才故曰弊邦治是八者其六為邦治
其二為官治蓋聯事者百官之事常數者百官之數
非若六者之關於邦治也大宰以是而統三百六十
職之任使其尊卑大小無非八法之是守故曰治官

府

以八則治都鄙一曰祭祀以馭其神二曰灋則以馭其官三曰廢置以馭其吏四曰祿位以馭其士五曰賦貢以馭其用六曰禮俗以馭其民七曰刑賞以馭其威八曰田役以馭其衆

則亦法也以法為式故曰則都鄙者王子弟及公卿大夫所食之采地或為家邑或為小都或為大都以其皆有邑都則曰都以其在國之鄙則曰鄙都鄙之

則其目凡八。一曰祭祀者謂都鄙有社稷五祀及其先君之廟典秩高下不可踰越。故曰馭其神。二曰法則者謂都鄙有伍兩殷輔與夫家臣之屬職守嚴整不相紊亂。故曰馭其官。三曰廢置者謂都鄙之吏任治於外則必有勤怠功過舉其能者而措其不能者。故曰馭其吏。四曰祿位者謂都鄙之士從乎政學則當考察其藝養之以祿而後定其位。故曰馭其士。五曰賦貢者謂都鄙以其田賦之十一者取於民而又

以稍縣都之十二者輸于王然後為之制其用度豈
殺之數故曰馭其用六曰禮俗者謂都鄙有稍縣都
之民則必有昏冠喪祭之俗因其俗而制其禮文輕
重之節故曰馭其民七曰刑賞者都士家士為之掌
其獄訟則必有刑賞以治其下故曰馭其威八曰田
役者都司馬家司馬為之掌車馬甲兵之戒令則必
有田役以作其急故曰馭其衆是八者皆謂之馭乃
所以馭都鄙也故秋官設都則之職專掌此八則之

法然謂之都則不言家則者何也考大宗伯九儀之命惟五命以上然後賜則王之大夫四命雖馭之以八則而未與賜則之數故采邑謂之家而不謂之都若卿以六命為小都公以八命為大都此所以置都則焉由是觀之八則通用於三等采邑而以都為主故總而言之曰治都鄙

以八柄詔王馭羣臣一曰爵以馭其貴二曰祿以馭其富三曰予以馭其幸四曰置以馭其行五曰生以馭其

福六曰奪以馭其貧七曰廢以馭其罪八曰誅以馭其過

六典八法八則大宰不言詔王而八柄言詔王此正大宰論道經邦明天下威福之柄以綱維斯世者也故八柄馭羣臣惟天子得專之惟大宰則詔之詔之者何人臣非爵無以貴之也必有德而後任故曰馭其貴人臣非祿無以富之也必有功而後授故曰馭其富子者予之以財也則必以恩而後得故曰馭其

幸置者置諸其位也位必以叙而後進故曰馭其行
罪至於可殺而有八議之辟賜之更生所以福之也
故曰馭其福罪至於不可貸而有削邑之罰奪其所
有所以貧之也故曰馭其貧廢言棄也臣有罪戾不
可委任褫其爵而棄之故曰馭其罪誅言詰也臣有
過失非其故為以官刑而詰之故曰馭其過是八者
不徒馭之而已自一至五則為慶賞自六至八則為
刑罰廢者置之反也奪者予之反也誅者曰爵曰祿

曰生之反也慶賞詳而列於先刑罰簡而列於後知所先後詳略矣

以八統詔王馭萬民一曰親親二曰敬故三曰進賢四曰使能五曰保庸六曰尊貴七曰達吏八曰禮賓

八統亦所以詔王也雖曰馭萬民而實本於王者之躬行故曰統言統於上而係屬於下者也親親則睦九族之類敬故則燕朋友之類進賢則興其德行使能則任其道藝保庸則安其有功者尊貴則崇其有爵

者達吏則察舉勤勞之吏禮賓則接遇諸侯之禮此皆王者之事而何與乎萬民然馭以親親則民莫遺其親馭以敬故則民莫慢其故馭以進賢則民知德之不可不務馭以使能則民知能之不可不勉馭以保庸則民知功實之不可害馭以尊貴則民知爵命之不可陵馭以達吏則民知交通之情馭以禮賓則民知交際之義上作而下應猶絲之牽物約其渙散而歸之於統故曰八統馭萬民

以九職任萬民一曰三農生九穀二曰園圃毓草木三曰虞衡作山澤之材四曰藪牧養蕃鳥獸五曰百工飭化八材六曰商賈阜通貨賄七曰嬪婦化治絲枲八曰臣妾聚斂疏材九曰閒民無常職轉移執事

先王之時凡民皆受田凡受田皆為農今三農特居九職之一而復有園圃虞衡之職又有藪牧百工商賈之職又有嬪婦臣妾閒民之職此非出於三農之外即民數之不足於受田者與受田而有餘力者為

之也蓋井田之制一夫受田百畝百畝之家上地七人中地六人下地五人以至家十人則受兩下地家十有二人則受兩中地家十有四人則受兩上地其餘參錯於三地之間等而上之皆以是為差惟上農夫食九人上次食八人中食七人則受田而有餘力者又四人以下則數之不足於受田者若是二者之民先王皆有道以處之居則使之任草木絲枲疏材之事出則使之任山澤鳥獸八材貨賄轉移之事是以無

一職之不得其養而亦無一民之不任其職故曰九職任萬民賈氏以九職之間民為不營已業之游民非也游民乃惰而自安者閒民則其數不足於受田者蓋家四人以下其數不足於受田而謂之間民亦有田之未授於民而謂之間田經雖不明言閒田之制而王制言天子之縣內凡九十三國名山大澤不以盼其餘以為閒田此謂田之未封邑者若夫鄉遂都鄙夫家衆寡有耗有登登謂十六受田耗謂六十

歸田其田在四等公邑之間天子使吏治之以待授民亦謂之間田間民亦然前解所謂四人以下不足于受田者先王處以間民之職使之耕間田而輸間粟餘則使之轉移八職而執其事如是則間田以待授民而非曠土間民以待授田而非游民不然間民何以列于九職之末耶以九賦斂財賄一曰邦中之賦二曰四郊之賦三曰邦甸之賦四曰家削之賦五曰邦縣之賦六曰邦都之賦七曰關市之賦八曰山澤之賦九曰幣餘之賦

九賦之法與上經九職不同九職所以任萬民九賦則非取于任民者也鄭氏皆以為民賦且援漢口率出泉之制其說一立王制不明學者惑之不容不辨一曰邦中之賦者即載師以廛里任國中之地以場圃任園地蓋王城內外之地也二曰四郊之賦者即載師以宅田士田賈田任近郊之地官田牛田賞田牧田任遠郊之地蓋六鄉百里之內而外距六遂之地也三曰邦甸之賦者即載師以公邑之田任甸地

蓋距國中二百里六遂之餘地天子使吏治之者也
四曰家削之賦者即載師以家邑之田任稍地蓋距
國中三百里大夫所食之采地也五曰邦縣之賦者
即載師以小都之田任縣地蓋距國中四百里卿及
王子弟之疏者所食之采地也六曰邦都之賦者即
載師以大都之田任疆地蓋距國中五百里公及王
子弟之親者所食之采地也七曰關市之賦者若與
九職之商賈同然商賈主乎貨賄阜通此則如司

市所言市之征司關所言關門之征是也八曰山澤之賦者若與九職之虞衡同然虞衡作山澤之材此則如州人所取金錫玉石角人所取齒角骨物之類是也九曰幣餘之賦者如職幣所言斂官府都鄙用邦財者之幣振掌事者之餘財是也前六者皆任地之賦以其田賦之十一者取於民又於一分之中復以十一十二二十而三輸之於王如是而已後三者雖非任地然有司所掌利歸公上故亦謂之賦而繼於

任地之後詳考大府一職既有九賦之式又別有邦國及萬民之貢則九賦非任民之賦可知矣

以九式均節財用一曰祭祀之式二曰賓客之式三曰喪荒之式四曰羞服之式五曰工事之式六曰幣帛之式七曰芻秣之式八曰匪頒之式九曰好用之式

大宰之制國用有三曰九職曰九賦曰九式而九式之均節財用特見於九賦之後是專為九賦設也故大府有九賦之式而不言九職九貢之式非無式也

大宰三十年之通制國用若九貢不在頒用之數則
以之待帛用九職不在頒用之數則以之充府庫此
成周備先具之道非若九賦為國家之經費也惟九
賦為國家之經費故大府之式法曰闕市之賦以待
王之膳服邦中之賦以待賓客四郊之賦以待稍秣
家削之賦以待匪頒邦甸之賦以待工事邦縣之賦
以待幣帛邦都之賦以待祭祀山澤之賦以待喪紀
幣餘之賦以待賜予是九者責之有司皆有式法焉以

式法待之論之則自賓客以至賜予皆有司之事以式法待之可也若王之膳服則何拘乎式法若拘以式法則膳夫何以不會王之膳外府何以不會王之服以至膳禽飲酒裘與皮事亦何以皆為之不會是數者皆至尊所御不可以有司之法會之也若大宰佐王論道則善服有式乃養成君德之大者此大府列膳服於九式之先豈無意哉

以九貢致邦國之用一曰祀貢二曰嬪貢三曰器貢四

曰幣貢五曰材貢六曰貨貢七曰服貢八曰旂貢九曰
物貢

九賦任地九職任民二者皆行于王畿千里之間而
王畿千里之外隨其地之遠近小大立為邦國九等
之貢九貢之目雖不詳見考之鄭氏自有成說因二
鄭之說而參之禹貢則有可以類推者禹之甸服實
維冀州其外八州別為侯綏要荒無因其地之所宜
責其地之所有故曰任土作貢用人以九貢致邦國

之用亦若是而已祀貢即浮磬菁茅之類嬪貢即絲
枲絺紵之類器貢即銀鏤斝丹之類幣貢即織縞織
皮之類材貢即栝栢篠蕩之類貨貢即金玉璜珠之
類服貢即玄纁織纊之類旉貢即羽毛璣組之類物
貢即魚鹽橘柚之類是九物者雖禹貢任土之舊亦
可推見成周九貢之法然大宰之于邦國謂九貢而
秋官大行人之六貢亦同九貢之目者何也蓋有歲
之常貢者有因朝而貢者因朝而貢則大行人之六

貢也歲之常貢則大宰之九貢也小行人又有所謂
令諸侯春入貢其此之九貢歟

以九兩繫邦國之民一曰牧以地得民二曰長以貴得
民三曰師以賢得民四曰儒以道得民五曰宗以族得民
六曰主以利得民七曰吏以治得民八曰友以任得民
九曰數以富得民

兩聯也屬也蓋人心以類相合而皆聽命于上不為
之兩則渙散睽異莫相統一聽其自兩而無所繫乎

其間則人心莫知所從相違相尤為患滋甚孟子曰
得天下有道得其民斯得天下矣得其民有道得其
心斯得民矣其要在于所欲與聚所惡弗施非兩相
聯屬而何成周于是設大宰之官自六典以至九貢
特先王維持天下之法制至此總攝人心而歸之于
一然後有所謂九兩牧即施典于邦國而建其牧者
長即施則于都鄙而建其長者師即學校之傳道授
業者儒即道德之化民成俗者宗如正室門子之類

可以收三族之親踈者主如郊甸任地之類不屬乎
吏而自為之主者吏如鄉遂公邑之吏各分其職而
治民之事者以至友如鄉田同井之友數如養蕃鳥
獸之數是九者皆有得民之實惟先王繫之有道故
其權一出于上而納天下于皇極之世粵自上失其
道民散久矣陵夷至于春秋之後齊晉吳楚迭主夏
盟六卿三家顯執國政道術分裂而田駢慎到之徒
人自為師儒學不明而畏壘之人乃有尸祝社稷之

事田懷屈景之族蟠據國中繕甲京城或以不義而
好勇至于朱郭任俠脫人之急刁卓殖貨富擬封君
然後知九者得民固不可使之奔軼四出而無所聯
屬于上此先王所以為固結人心之本不容一日釋
者也然曰牧曰長曰主與吏曰宗與藪無非勢與利
之所在後之有天下者猶得以操其柄而制其變若
儒與師友疑似不辨或至于陷溺人心此夫子以儒
道設教于洙泗之間七十子之徒師友淵源萬世宗

主亦可以驗其得民之效然則大宰列是三者于九
兩之中則知先王之繫民勢與利云乎哉

正月之吉始和布治于邦國都鄙乃縣治象之灋于象
魏使萬民觀治象挾日而斂之

近代為暮年一變之說者引此經以為證殊不知此
非變法也特新之而已鄭氏謂重治灋新王事是也
鄭氏又謂正月朔日布王治之事於天下至正歲又
書而縣于象魏使萬民觀焉蓋以小宰互文推之其

理殊不然小宰正歲所觀不言縣治象則知非大宰
縣治象之時也大宰縣治象繼于正月始和之下是
以周正建子示萬民以更始之意何必就合乎小宰
之說至謂象魏為闕尤所未安據左氏哀三年魯定
季桓子御公立于象魏之外命藏象魏若此未可據
謂之闕也魏即巍巍之貌也蓋治見于象者為治象
書治象之法者為象魏兩觀之縣象魏者為魏闕縣
之十日即斂而藏之至小宰于正歲帥屬而觀則觀

之于已斂之後此其序也教官政官刑官倣此

乃施典于邦國而建其牧立其監設其參傅其伍陳其
殷置其輔乃施則于都鄙而建其長立其兩設其伍陳
其殷置其輔乃施法于官府而建其正立其貳設其攷
陳其殷置其輔

大宰之六典佐王治邦國八則治都鄙八法治官府
前已叙之矣今又曰乃施典于邦國乃施則于都鄙
乃施法于官府者前舉其凡以見大宰之所職今更

為之申敕亦以見施行之次第也牧者何大宗伯云
八命作牧九命作伯此不言伯者伯亦為牧舜于十
二州為十二牧禹之九州為九牧殷于八州為八伯
外有二伯周設二伯復為九牧以統九州之諸侯書
所謂以倡九牧是也監者何王制云天子使其大夫
為三監監于方伯之國國三人武王之初亦設三監
皆殷之制成王以三監作亂而令諸侯為監以司糾
察之任書所謂王啟監厥亂為民是也設其參者鄭

氏以為卿三人王制所謂大國次國三卿是也傳其
伍者鄭氏以為五大夫王制所謂大國次國小國下
大夫五人是也陳其殷者鄭氏以為衆士即上士中
士下士之類置其輔者鄭氏以為庶人在官即府史
胥徒之類此六者各設其職乃所以施其典于邦國
者也長者即公卿大夫及王子弟之食采者立于畿
內為內諸侯是之謂長有長必有屬故為之立其兩
兩即鄭氏所謂兩丞之類以至殷亦衆士輔亦府史

胥徒即都家宗人，都家司馬之所掌者是也。正者，何即六官之長，如天官冢宰之類，各帥其屬以舉邦治。是之謂正，有正必有屬，故為之立其貳，設其攷，即鄭氏所謂小宰、宰夫之類。以至殷亦衆士、輔亦府史、胥徒，即宮伯、宮正以下凡六品所掌者是也。然周自武王克殷之後，立爵惟五分土，惟三建官，惟賢位事，惟能所謂邦國之君臣都鄙之長屬官府之正貳，固已截然有一定之制，初不待太宰之所建，所立以至陳。

之置之也當是時也周公攝政制禮作樂典章文物粲然大備于是設為六典八法八則之制以作新天下之治前所謂申敕之者是矣

凡治以典待邦國之治以則待都鄙之治以灋待官府之治以官成待萬民之治以禮待賓客之治

上經言施典法則于邦國官府都鄙而邦國官府都鄙之有所治于大宰者又復以此待其治猶以為未焉復舉所謂官成賓禮而待之且八法之官成本以

治官府而此則曰待萬民之治八統之禮賓本以馭
萬民而此則曰待賓客之治何也官成雖用于官府
而八成所謂政役閭里師田稱責無非民也禮賓雖
以馭萬民而大小行人司儀掌客之所職者無非賓
客之事也蓋有國斯有禮有土斯有民邦國官府都
鄙雖不同而二者之治則亦相參而用之耳

祀五帝則掌百官之誓戒與其具脩前期十日帥執事
而卜日遂戒及執事眡滌濯及納亨贊王牲事及祀之

日贊玉幣爵之事祀大神示亦如之享先王亦如之贊
玉几玉爵大朝覲會同贊玉幣玉獻玉几玉爵

祀天大禮也其次五帝也大宰言祀五帝而不言祀
天以王者祀天不敢指而名之故大宰所掌者祀五
帝而已言祀五帝則祀天可以類舉也蓋蒼蒼正色
者天也主宰萬物者帝也帝之與天名異而實同上
古之君德同乎天萬世推之尊以祀配帝天亦謂之
帝月令所謂其帝大昊其帝炎帝其帝黃帝其帝少

吳其帝顓頊是已若鄭氏言帝出于緯書蓋指五精
之君以經意推之其殆大宗伯所謂青圭赤璋白琥
玄璜所禮之四方者耶經于四方初不言帝故器與
牲幣各放其方之色大宰所謂五帝則牲玉幣爵與
上帝同其用然後信大宰所謂五帝者即月令之五
人帝也方其祀事之始百官在列大宰臨之誓者警
之以言戒者敕之以事具謂備其牲牢鼎俎之物脩
謂嚴其掃除糞洒之事如此則恭敬誠慤之念固已

素孚于未祀之先矣于是前期十日帥執事而卜日遂
戒至祀前一日及執事盥滌濯又至納亨之夕王袒而
迎牲射牲割牲大宰則剪其毛而贊之焉及至于行事
授以奠焉五帝之祀如此則祀大神示可知也祀大神
示如此則享先王可知也故皆曰亦如之惟玉几所以
依神玉爵所以薦神獨于享先王用之人事尚文故耳
大喪贊贈玉含玉作大事則戒于百官贊王命

君薨百官聽于冢宰不以天下忘乎親也故雖國政

之大者亦委而聽焉含玉施于始死之時贈玉施于既窆之後此喪禮之末共于典瑞專于大宰職也而必曰贊云者是知百官雖聽于冢宰而冢宰實未嘗一日而廢乎王命也

王眡治朝則贊聽治眡四方之聽朝亦如之凡邦之小治則冢宰聽之待四方之賓客之小治

朝儀有內外邦治有大小此二事最相關屬皆所以為大臣之體治朝在路門之外日朝以聽國事者也

四方之聽朝者天子巡狩征伐諸侯各朝于方岳之下者也二者天下之大權皆天子親之冢宰特贊之而已二者之外則冢宰為之決其小治或謂小治如八法八則九貢九賦之類不以詔王者皆小治也以此為小孰為之大故嘗謂天子胝路門之朝則冢宰為之聽其小治如宰夫所言禁令之類天子聽方岳之朝則冢宰為之待四方賓客之小治如職方氏所言戒令之類是謂政無大小皆所兼統內外得其宜

矣

歲終則令百官府各正其治受其會聽其致事而詔王
廢置三歲則大計羣吏之治而誅賞之

歲終受其會者受百官府所致之會也有小宰焉以
官府之叙受羣吏之要贊冢宰受歲會歲終則令
羣吏致事又有宰夫焉歲終則令羣吏正歲會月終
則令正月要旬終則令正日成而以攷其治蓋有官
必有事有事必有考有考必有時日之有成日考之

也宰夫受之月之有要月考之也宰夫令之而小宰受之歲之有會歲考之也小宰贊之而大宰受之考績設官其序如此是以歲終之際大宰則以是令之于百官府使之各正其治謂之百官府則六官皆總而不止乎治官之屬所以為大宰統百官之任何謂統百官之任曰會曰要曰成雖考于三官而實散見于三百六十職之中酒正之日入其成月入其要司會之以參攷日成以月要攷月成以歲會攷歲成司

書及事成則又入要貳焉此見于治官之屬者然也
至於司徒則正要會鄉師則受役要司馬于要則受
之士師于要則正之此見于六官之屬者然也不特
此而已王制曰司會以歲之成質于天子冢宰齋戒
受質大樂正大司寇市三官以其成從質于天子大
司徒大司馬大司空齋戒受質百官各以其成質于
三官大司徒大司馬大司空以百官之成質于天子百
官齋戒受質夫司會天官也大司徒之與市三官地

官也大樂正大司馬大司寇大司空則四時之官也
司會質其成矣三官乃從司會而質于天子冢宰贊
天子受其質矣三官則以百官之成質于天子以是
知六官之屬皆在所考六官之長皆預考績冢宰則
統百官而操其柄焉以是受其會則兼總乎三百六
旬之成以是聽其致事則兼決乎三百六十職之事
于是歲終則詔王行廢置之法至三歲之久則又大
計羣吏之治而行誅賞之法夫三歲之誅賞固大于

歲終之廢置也廢置詔王而誅賞不以詔王者何耶
歲終之考覈方嚴則行之以天子之命三歲之考覈
既審則守之以一代之法司會曰以周知四國之治
以詔王及冢宰廢置則廢置之詔王可知也宰夫曰
凡失財用物辟名者以官刑詔冢宰而誅之其足用
長財善物者賞之則誅賞之責于大宰可知也會計
之法一舉而上下體統得其正矣

欽定四庫全書

卷一

欽定四庫全書

周官總義卷二

宋 易祓 撰

小宰之職掌建邦之宮刑以治王宮之政令凡宮之糾
禁

古人立法自貴者始於是乎有王宮之刑宮刑不見
於經以宮正所掌推之所謂辨外內而時禁幾其出
入均其稍食去其淫怠與其竒衰之民即此之政也
所謂稽其功緒糾其德行與夫會其什伍而教之道

藝即此之令也以此糾察其不然則曰糾以此禁止其未然則曰禁宮刑以治王宮之政令凡宮之糾禁則其政令糾禁之所棄者乃小宰宮刑之所加者也然則小宰者治官之貳也故宮刑所治首言王宮之政宮正者治官之屬也故以政為戒而掌王宮之戒令糾禁蓋宮正所掌亦即推行乎小宰之所掌則是亦推行乎小宰之治者也或謂凡宮兼言后宮失之矣

掌邦之六典八灋八則之貳以逆邦國都鄙官府之治
執邦之九貢九賦九式之貳以均財節邦用

此六者大宰專之小宰貳之書之副曰貳亦所以貳
大宰也大宰以前三者兼總治體而專其操舍之大權
矣小宰則以其貳而察其善否之實故曰以逆邦國
都鄙官府之治大宰以後三者兼制國用而專其斂
散之大權矣小宰則以其貳而謹其出內之吝故曰
以均財節邦用此所以為治官之貳

以官府之六叙正羣吏一曰以叙正其位二曰以叙進其治三曰以叙作其事四曰以叙制其食五曰以叙受其會六曰以叙聽其情

百官所居謂之府任官府之職者謂之吏凡官府之吏有位斯有治有治斯有事有事斯有食有食斯有會有會斯有情非叙無以正之於是小宰以六叙正羣吏何謂位公一位卿一位大夫一位上士一位中士一位下士一位凡六等宰夫言治朝之法是也何

謂治曰正曰師曰司曰旅曰府史曰胥徒各有所治
凡八等宰夫言百官府之徵令是也何謂事或大事
則從其長或小事則專達司士言以能詔事是也何
謂食或稽其事而制其食或乘其事而上下其食司
士言以久奠食是也何謂會有會其政事者有會其
財用者宰夫司會所掌之類是也何謂情有納訪之
情有復逆之情內史小臣所掌之類是也惟其位有
貴賤治有小事有先後食有多寡會有詳畧情有

好惡以此六叙而正之則正朝廷以正百官莫不一於正矣

以官府之六屬舉邦治一曰天官其屬六十掌邦治大事則從其長小事則專達二曰地官其屬六十掌邦教大事則從其長小事則專達三曰春官其屬六十掌邦禮大事則從其長小事則專達四曰夏官其屬六十掌邦政大事則從其長小事則專達五曰秋官其屬六十掌邦刑大事則從其長小事則專達六曰冬官其屬六十

十掌邦事大事則從其長小事則專達

此大宰八法之官屬也小宰則列其條目而加詳焉
六官之長為六卿六卿各帥其屬其屬各六十合六
屬而論則其象周天之度今以叙官攷之天官之屬
六十有三地官之屬七十有九春官之屬七十有一
夏官之屬七十秋官之屬六十有五此五官之屬固
已三百四十有八雖冬官散落無紀計其數總四百
有餘何耶聖人法天建官天度奇而不齊聖人亦不

如是之拘舉其成數曰其屬六十而已大事則從其長非特六官之長也凡職皆有長焉大事則其屬從之小事則專達此又六屬小大相承之意

以官府之六職辨邦治一曰治職以平邦國以均萬民以節財用二曰教職以安邦國以寧萬民以懷賓客三曰禮職以和邦國以諧萬民以事鬼神四曰政職以服邦國以正萬民以聚百物五曰刑職以詰邦國以糾萬民以除盜賊六曰事職以富邦國以養萬民以生百物

小宰之六職自治職之平邦國均萬民以至事職之富邦國養萬民與大宰六典所言或同或異有詳有畧無非所以推行乎六典者也然六典治邦國故先百官而後萬民此六職雖言邦國萬民而不及百官者以其所職莫非官府故不言百官而各言六職之事財用會計屬乎天官之職故治職曰以節財用封建委積屬乎地官之職故教職曰以懷賓客掌天神人鬼地示之禮屬乎春官之職故禮職曰以事鬼神

掌財用九穀六畜之數屬乎夏官之職故政職曰以聚百物詰姦慝刑暴亂者屬乎秋官之職故刑職曰以除盜賊居四民時地利者屬乎冬官之職故事職曰以生百物是六者特六職之大槩推之六職之中皆各有宰夫之八職於是纖悉畢舉而邦治辨矣以官府之六聯合邦治一曰祭祀之聯事二曰賓客之聯事三曰喪荒之聯事四曰軍旅之聯事五曰田役之聯事六曰斂弛之聯事凡小事皆有聯

合官府之六聯於辨六職之後有所辨而後有所合也
大宰所謂官聯以會官治是已故吉禮賓禮掌於
大宗伯則凡六官之有職於祭祀賓客者皆其聯事
也凶禮軍禮掌於大宗伯則凡六官之有職於喪荒
軍旅者皆其聯事也若乃大司馬掌田獵之事大司
空掌徒役之事則凡六官之有職於此者皆田役之
聯事也大府掌斂貨賄之類鄉大夫辨其可舍之類
則凡六官之有職於此者皆斂弛之聯事也終之以

凡小事皆有聯則知此六者皆大事矣上經言大事從其長固可以聯事小事專達則亦可取乎聯小事有聯尤見成周設官之不苟如此

以官府之八成經邦治一曰聽政役以比居二曰聽師田以簡稽三曰聽閭里以版圖四曰聽稱責以傅別五曰聽祿位以禮命六曰聽取予以書契七曰聽買賣以質劑八曰聽出入以要會

載天下之成法者謂之成別謂八成言成而不可變

天下之常經也大宰之官成以經邦治是已比謂國
比居謂民居既有成法矣小司徒合萬民之卒伍以
待政典之役則以比居聽之簡謂兵器稽謂人民既有
成法矣大司徒以旗致民而為蒐苗獮狩之舉則以
簡稽聽之版謂夫家生齒之版圖謂土地風氣之圖
既有成法矣欲校登其閭里人民之數則以版圖聽
之傳謂地傳以為之保別謂判書以為之合既有成
法矣欲參決其稱貸責償之實則以傳別聽之禮命

謂禮儀之命多寡隆殺皆成法也凡祿位同而尊卑混者以禮命聽之書契謂契驗之書彼此先後皆成法也凡以物取予而其情異同者以書契聽之人之保任謂之質文之要約謂之劑亦成法也凡市之賣買而未易別識者以質劑聽之月之所成謂之要歲之所成謂之會亦成法也凡財用之出入而未易稽考者以要會聽之是八者皆謂之聽或以為聽獄訟非也大司寇之職曰凡萬民之獄訟以邦成弊之斯

以八成而聽其獄訟者歟蓋司寇刑官所主獄訟小
宰非獄訟之責也聽其治而已如酒正所謂小宰聽
之者聽其治者也

以聽官府之六計弊羣吏之治一曰廉善二曰廉能三
曰廉敬四曰廉正五曰廉澹六曰廉辨

廉察也察而曰廉者取其方而可見者也吏治亦然
善欲其端能欲其厲敬欲其慤正欲其勁法欲其有
所守辨欲其有所決皆其方而可見者不然計稽也

弊斷也無非所以察吏治不曰察而曰廉豈無意哉
以灋掌祭祀朝覲會同賓客之戒具軍旅田役喪荒亦
如之七事者令百官府共其財用治其施舍聽其治訟
法式也天下之事不豫則不立祭祀朝覲會同賓客
以至軍旅田役喪荒之事凡七者皆國事之大不素
戒而先具則必有緩不及事之患故平居之際戒其
所當為之事具其所當用之物小宰皆以式法掌之
而待其事焉共其財用者何大府之職以邦都之賦

待祭祀邦中之賦待賓客四郊之賦待稍秣山澤之
賦待喪紀乃至邦國之貢以待吊用是大府與其屬
共之而令之以灋者小宰也治其施舍者何鄉大夫
之職以歲時登其夫家之衆寡而辨其可任者其舍
者國中貴者賢者能者服公事以至老者皆舍是鄉
大夫與其屬治之而令之以法者小宰也治則有所
治而質於我訟則有所訟而決於我皆令百官府各
以其職而聽之言百官府則非特天官為然小宰於

六官皆得而令之宰夫又從而比之故言贊小宰比官府之具

凡祭祀贊玉幣爵之事裸將之事凡賓客贊裸凡受爵之事凡受幣之事喪荒受其含祔幣玉之事

大宰祭祀則贊玉幣爵之事小宰又從而助其贊於大朝覲會同則贊玉幣玉爵小宰又從而贊其所受受爵受幣不言贊蒙贊裸之上文也此小宰所以為大宰之貳大宰以祀五帝為主故不言裸宗廟之

禮也王用圭瓚酌鬱鬯以裸神小宰則將而送之賓客亦有裸上公再裸侯伯子男壹裸小宰皆為之贊裸事若夫喪禮則諸侯致助送之含祔荒禮則諸侯致調委之幣玉無所贊也自受而達之爾

月終則以官府之叙受羣吏之要贊冢宰受歲會歲終則令羣吏致事

小宰以叙受羣吏之要而六叙則曰以叙受其會者何也事有詳畧職有尊卑尊者總其綱卑者舉其目

金史卷之二
卷二
歲會所以統月要也月要所以統日成也日成則宰夫受之月要則小宰受之然後冢宰於歲終受歲會小宰則以叙贊之而已贊冢宰受歲會而後令羣吏致事者小宰令之而後冢宰聽之且詔王廢置焉本末相因執要御詳之道也

正歲帥治官之屬而觀治象之灋

夏正建寅謂之正歲周正建子謂之正月此一經之通例也大宰於正月之吉固已縣象於象魏使萬民

觀之矣小宰復於正歲帥其屬而觀治象與大宰所
縣者相去兩月之久殊非挾日斂之之義學者疑焉
鄭氏以互文推之乃謂大宰縣治象於正歲恐非經
之本旨蓋建子為時王之正月示萬民以更新之意
故大宰縣治象於月吉而復斂於挾日建寅為民時
之正歲吏治於是乎始故小宰帥治官之屬觀治象
於已斂之後以治官專掌治象之法不拘乎縣治象
之時也

狗以木鐸曰不用灋者國有常刑乃退以宮刑憲禁于王宮令于百官府曰各修乃職攷乃灋待乃事以聽王命其有不共則國有大刑

小宰一職專掌宮刑以治王宮之政令糾禁而其間並不及王宮之事所謂憲禁者特見於治官觀象之後是知外廷中禁其政皆出於一然治官之屬不用灋者特警之以常刑宮中之官其有不共乃警之以大刑者何耶尊君之誠專則近君之法嚴以大刑警

之則宮中皆修職守法之士大刑雖設而實未常用也

宰夫之職掌治朝之灋以正王及三公六卿大夫羣吏之位掌其禁令

天子有三朝曰燕朝曰治朝曰外朝亦有五門自外而內則曰臯門曰庫門曰雉門曰應門曰路門書以路門為畢門師氏以路門為虎門皆王者眡朝之地也後鄭謂燕朝在路門之內又謂在路寢之庭至門

其實一也而鄭司農則曰治朝在路門之內外朝在路門之外據置治朝在路門之內則置燕朝於何所外朝在路門之外則置治朝於何所此其說不攻而自破今攷大僕掌正燕朝之服位而曰建路鼓於大寢之門外寢門即路門也知路門內為燕朝則路門外為治朝可知矣况師氏司王朝於虎門之左則知治朝決在路門之外宰夫所掌治朝之法即路門之外王日視之朝王眡治朝而大宰贊王聽治故宰夫

掌治朝之法以正王及三公六卿大夫羣吏之位司
士又於此正朝儀之位辨其貴賤之等王南鄉三公北
面東上孤東面北上卿大夫西面北上王族故士虎
士在路門之右南面東上大僕大右大僕從者在路
門之左南面西上此即治朝之儀令其如儀而禁其
不如儀於是掌其禁令

叙羣吏之治以待賓客之令諸臣之復萬民之逆

此經繼於朝位之後正慮其堂陛之嚴而人情易至

於隔絕故也賓客之有求於朝者謂之令諸臣以言而反命者謂之復萬民自下而有言於上者謂之逆有以待之則下得以致其情於上待之不以叙則上亦無以審擇於其下故賓客之令有輕重諸臣之復有先後萬民之逆有緩急宰夫皆叙羣吏之治以待之則賓客臣民其有遺情耶

掌百官府之徵令辨其八職一曰正掌官灋以治要二曰師掌官成以治凡三曰司掌官灋以治目四曰旅掌

官常以治數五曰府掌官契以治藏六曰史掌官書以贊治七曰胥掌官叙以治叙八曰徒掌官令以徵令

總六官而言則謂之百官府責成於百官府則謂之徵令徵謂上有所召令謂下有所稟辨其八職使之各有所掌者應上之徵令而已正所以長其屬固言乎六官之長所謂掌官法以治要則治其一月之要也師所以帥其屬固言乎六官之貳所謂掌官成以治凡則治其一旬之成也司言其職固屬乎六官之

攷所掌者官法所治者條目目則詳於凡者也旅言
其衆固屬乎上士中士下士所掌者官常所治者縷
數數則詳於目者也府謂六官之府主蓄藏之物必
有契以為之驗故掌官契以治藏史謂六官之史主
事物之籍必有書以為之攷故掌官書以贊治史下
之胥所以掌徒役之次叙胥下之徒所以掌奔走之召
令前四者皆王臣也後四者庶人之在官者也職尊
則所掌者大而畧職卑則所掌者小而詳以徵令辨

之則六官之職舉矣

掌治灋以攷百官府羣都縣鄙之治乘其財用之出入
凡失財用物辟名者以官刑詔冢宰而誅之其足用長
財善物者賞之

百官府者謂王朝六官之屬及列職於鄉六遂者羣
都縣鄙則自甸稍以至縣都之地皆在王畿千里之
內其治至不一也其財用物亦不一也財謂九賦所
入者用謂九物所出者物即官府郊野縣都之百物

財用物是三者皆民力所出國計所係不可不察也
於是宰夫為之乘其出入然必先以治法攷治者蓋
大宰以八法治官府以八則治都鄙小宰則又以八
法八則而逆官府都鄙之治宰夫又為之掌其治法
則官府都鄙之治及其財用物之數其綱目纖悉皆
不逃吾八法八則之中矣以是而乘其出入則乘其
數而已是雖百千萬億皆不外乎所乘之數凡失此
三者而又隱匿其失則以官刑詔冢宰而誅之足用

謂事不之用用不廢事長財謂出內之各常有餘用
善物謂守視之謹無所虧損此三者則詔冢宰而賞
之此蒙上文故不再言詔誅賞必詔冢宰者宰夫能
攷其功罪而誅賞則自上出也冢宰必待宰夫所詔
而行誅賞者付諸有司之公而我無與也其與後世
剥民財肥國計而行殿最之法者異矣

以式灋掌祭祀之戒具與其薦羞從大宰而眡滌濯

大宰於祭祀言戒具而未嘗言法小宰言法矣而未

嘗言式法兼掌治小而詳也式謂用財之式法謂
治事之法所謂戒具者大宰掌之小宰掌之宰夫又
掌之祭祀之事大體重故聯事合治不嫌乎尊卑之
同也薦謂所進脯鹽羞謂庶羞內羞此有司所共宰
夫又以式法掌之若夫祭祀之前期及執事眡滌濯
乃大宰之事宰夫特從之而已

凡禮事贊小宰比官府之具

凡禮事者五禮之事也小宰以法掌祭祀朝覲會同

賓客之戒具軍旅田役喪荒亦如之以五禮而言祭祀吉禮也朝覲會同賓客賓禮也軍旅田役軍禮也喪荒凶禮也雖不言嘉禮而饗燕之禮見於賓禮膳膳之禮見於吉禮別而言之故為七事又曰七事者令百官府共其財用所謂官府之具者此也比則叙之而已所以贊小宰之所令者

凡朝覲會同賓客以牢禮之滫掌其牢禮委積膳獻飲食賓賜之殮牽與其陳數

王氏詳說曰賓客牢禮之數見於行人之大者又見於掌客之職宰夫天官之攷又從而掌其數此所以見成周之重賓禮也曰牢禮之法者委積膳獻飲食賓賜之殮牽無非牢禮也聘禮云賓至大夫帥至於館宰夫朝服設殮是賓始至則有殮禮矣殮小禮也又云聘日致饗是賓已至則有饗禮矣饗大禮也先鄭以殮為夕食則非也賈氏以饗餼為牢禮亦非也賓至設殮何待夕乎凡禮皆有牢何必饗乎委積膳

獻飲食賓賜之飡牽掌客行人所掌可攷而知也上
公五積侯伯四積子男三積遺人所謂十里有廬廬
有飲食三十里有宿宿有路室路室有委五十里有
市市有候館候館有積是往來道路間所給用也膳
則掌客所謂上公殷膳大牢以及歸侯伯殷膳則無
以及歸矣子男則無殷膳矣此之謂膳也獻則掌客
所謂上公乘禽日九十雙侯伯乘禽日七十雙子男
乘禽日五十雙惟上介皆有禽獻此之謂獻也飲則

大行人所謂上公饗禮九獻侯伯饗禮七獻子男饗禮五獻此之謂飲也食則大行人所謂上公食禮九舉侯伯食禮七舉子男食禮五舉此之謂食也賓賜則掌客所謂凡介行人宰史皆有饗飧餼以其爵等為之宰禮之陳數曰賓賜云者以其賓之故而賜其羣下耳此之謂賓賜也飧牽則是自委積以下膳獻飲食賓賜皆有飧牽也掌客所謂上公飧五牢饗餼九牢其死牢如飧之陳牽四牢侯伯飧四牢饗餼七牢

其死牢如殮之陳牽三牢子男殮三牢饗餼五牢其
死牢如殮之陳牽三牢此之謂殮牽也但致積致殮致饗
餼致饗食與夫賓賜皆有牢數必曰殮牽者以賓始
至之禮為言耳委積雖不言牢數然積視殮牽三問
皆修羣介行人宰史皆有牢則委積往來皆有之此
所以先於膳獻飲食也言殮而不及饗言牢而不及
死牢義亦在其中矣

凡邦之弔事掌其戒令與其幣器財用凡所共者大喪

小喪掌小官之戒令帥執事而治之三公六卿之喪與
職喪帥官有司而治之凡諸大夫之喪使其旅帥有司
而治之

古者喪弔之儀無非所以伸君臣之情全始終之義
凡邦之弔事則以諸侯諸臣而言之大喪小喪則以
后及世子夫人以下而言之三公六卿諸大夫之喪
則又有尊卑焉掌之有異禮治之有異職稱其分而
已

歲終則令羣吏正歲會月終則令正月要旬終則令正
日成而以攷其治治不以時舉者以告而誅之

天官之職小宰所以贊冢宰宰夫所以贊小宰其治
一也小宰之職曰月終則以官府之叙受羣吏之要
贊冢宰受歲會是歲之有會冢宰受之也而小宰贊
之月之有要小宰受之也而宰夫贊之日之有成宰
夫受之也而皆得以令羣吏正要會焉蓋一事之修
積而至於無一事之不修一日之謹積而至於無一

日之不謹宜乎歲會月要日成之治宰夫皆得以令之也令之者使之蚤正於先而後宰夫得以攷羣吏之治何謂攷治小宰於正歲帥羣吏觀治象而有常刑之戒令又積日成月成而至於歲成矣果不以時而舉其治則以告而誅之與上經官刑詔冢宰之誅同

正歲則以灋警戒羣吏令修宮中之職事書其能者與其良者而以告于上

此經言令官中之吏與上經令官府之吏同意然上經於吏治不舉以告而誅而不及能與良之書何耶宰夫於足用長財善物之人既以詔冢宰而賞之則能與良之書為有素矣而未及夫官中之吏故小宰於正歲憲王宮之禁令而有死刑之戒令又至於正歲則期已久矣其間職事振舉而有能者良者皆已著見則又書之以告於上二者皆言告於冢宰之職也蓋大宰於三歲大計羣吏之治而行誅賞之法則

亦誅賞乎宰夫之所告者而已矣

宮正掌王宮之戒令糾禁

小宰掌宮刑以治王宮之政令糾禁宮正復掌其令與糾禁而不言政者以政為貳官之事也故不掌其政而掌其戒所謂戒者亦宰夫以法警戒羣吏而修宮中之職事者也是所掌之戒令糾禁實上承乎小宰宰夫而兼總于大宰也夫大宰以外廷之大臣而特總宮正宿衛之職者何歟周自文王以來王政實先於內治侍御

僕從罔匪正人雖綴衣虎賁趣馬之職亦惟常人吉
士之求惟大宰以大臣臨之宮壺朝廷均為一體非
若後世之疎外廷而親內署者也或謂宮正所掌宿
衛正西漢光祿勳所掌郎衛之職似矣漢初郎選甚
重以明經孝廉賢良方正等充之豈不以備宿衛之
儀當時署郎獨敬長官而於王宮無所禁是以體統
不正考覈無法而賢否無辨閔燕之際私昵勝矣是
知宮正列屬於大宰者正所以兼制內廷之私人而

又以小宰宰夫之戒令糾禁行乎其間養成君德如此成周設官之微意也

以時比宮中之官府次舍之衆寡為之版以待夕擊柝而比之國有故則令宿其比亦如之辨外內而時禁稽其功緒糾其德行幾其出入均其稍食去其淫怠與其奇衰之民會其什伍而教之道藝

王宮以教為本必先為之比其人申其法而後教行焉何謂比其人王宮宿衛有官府之吏有國之士庶

子有守王宮之民三者環列於八次八舍之間而宮
正則有時比之法為之版以待則籍其名之多少夕
擊柝而比則計其人之在否國有祭祀兵戎喪紀之
故則其比亦然所謂比其人者也何謂申其法王宮
有內外自雉門內以至燕寢則為內自雉門外以至
外朝則為外內外嚴密不可不辨啓閉之際以時而
禁然後為之稽其功之見於緒者糾其德之見於行
者幾其人之出入均其人之稍食或有竒衰淫怠之

民則斥而去之此所謂申其法者也二者既立然後
為之會其人什與什聯伍與伍聯而使之相勉於道
藝而其教成矣宮中官府之吏次舍之士庶子鄭氏
言之悉矣惟所謂民者宮正無明文鄭氏以為宮中
吏之家人非也至尊所御内外有禁豈羣吏家人所
得而至司隸曰掌帥四翟之隸使之各服其邦之服
執其邦之兵守王宮此宮中之民其四隸之民耶或
謂戎狄之民非我族類何以寘於宿衛之列且使之

服其邦之服執其邦之兵得非賊器奇服怪民之入
宮者歟是不然四翟之民即南方之蠻東南之閩東
方之夷東北之貉其服屬為有素非西戎北狄比也
蓋周自文王之世西有昆夷之患北有獫狁之難惟
東南之地王化先及以基王業至周公攝政制禮作
樂推原乎王化之所始南方曰象則有象胥之職以
待蕃國之使東夷之樂曰韎則有韎師之職以薦宗
廟之樂及此四翟之隸司隸亦帥之以備王宮之守

皆此意也宮正舉服屬者列於官府士庶子之後而宿衛之政舉矣

月終則會其稍食歲終則會其行事

稍食所養吏士會於月終則小宰為之受其要行事則吏事之見於所行者會於歲終則冢宰為之受其會

凡邦之大事令于王宮之官府次舍無去守而聽政令邦之大事則祭祀兵戎之事也王宮宿衛最為嚴肅

而倉卒煩劇人情亦易以擾凡平日所以比其衆寡合其什伍禁其內外幾其出入者皆所以為有事之備也令無去守其意深矣

春秋以木鐸修火禁

司烜中春以木鐸修火禁於國中為季春出火順天時也然不及中秋之火禁且特修其禁於國中而已至王宮則春秋出內火之夕皆從而修之以王宮事重於國中故也

凡邦之事蹕宮中廟中則執燭大喪則授廬舍辨其親疎貴賤之居

此經正與閹人相聯特有內外之辨閹人曰大祭祀喪紀設門燎蹕宮門廟門以大祭祀在廟中大喪紀在宮中即此所謂凡邦之事是也但閹人掌守王宮中門之禁特有職於宮門廟門而已若宮正掌王宮之宿衛則與閹人不同閹人設燎於門此於宮中廟中則執燭閹人於宮門廟門蹕此言凡邦之事其所

蹕者廣也然所謂蹕考之司隸則皆屬乎四隸隸僕掌蹕宮中之事則知以四隸為之蹕以四隸乃主王宮者而宮廟實一體是知廟中亦四隸為之蹕而宮中廟中之執燭亦四隸為之也故宮正皆掌之宮伯掌王宮之士庶子凡在版者

宮伯所掌即贊宮正之所比者宮正雖不明言士庶子所謂以時比宮中之官府次舍之衆寡則若官若民若士庶子咸在焉故宮正以時比之為之版以待

此乃宮正所掌次舍名數之版宮伯則掌在版之士庶子而已

掌其政令行其秩叙作其徒役之事授八次八舍之職事若邦有大事作宮衆則令之

宮正於邦之大事令聽政令宮伯又為之掌其政令然非特事之大者凡事皆掌之也何謂凡事秩者祿廩之高下叙者功緒之先後徒役者宮中徼巡奔走之事及宿衛者居之授職事者即擊柝令宿之類此

皆平時行於王宮者若大事作宮衆則令之鄭氏謂
或選當行殊不知士庶子之職有當行者有不當行
者出而守禦國鄙如諸子所謂帥國子而致於太子
唯所用之則在所當行入而宿衛王宮若宮正所謂
令於王宮之官府次舍無去守而聽政令豈所當行
者哉作宮衆則令不過令無去守而已

月終則均秩歲終則均叙以時頒其衣裘掌其誅賞

月終則均秩秩祿稟與宮正均稍食一也歲終則均

叙與宮正則異彼宮中官府故會其行事此其子弟
故均其叙叙即才等也以時頒其衣裘夏時頒衣冬
時頒裘掌其誅賞者士庶子有功則賞有罪則誅之
也此誅賞之法即推行宮正戒令糾禁之法者也戒
而後令作其為善糾而後禁止其為惡此宮正所以
列之於始為善不怠勉之以賞為惡不悛厲之以誅
此宮伯所以叙之於終反復二官始終可見矣